

Date – 09/04/2026

Time - 7:30 -7:40 Hrs

AKASHVANI AIZAWL

REGIONAL NEWS BULLETIN

HEADLINES (MORNING)

1. Chief Minister Pu Lalduhoma'n Aizawl khawpuia hriselna Aizawl khawpuia hriselna hmunhma ten chak takin hma a sawn mek tih a sawi.
2. Mizo Hlakungpui Mual thawh 6-na ni hnihna chu vawiin hian Khawbung ah hman chhunzawm a ni dawn a, Hla Kungpui Mualah Mizo thu ziak mi 4 leh hla phuah thiam mi 2 chawimawina lung hawn a ni ang.
3. Central YMA Co-Ordination Committee Vawi 105-na nimina thukhawm chuan 'Inner Line Permit (ILP) chu tun aia khauh leh awmze nei zawka kalpui anih theih nan sawrkarah thlen ni se tiin an rel.
4. Tukin dar 7 atang khan Keralam, Assam leh Puducherry Assembly inthlan vote thlak tan a ni.

<><><>

CM

Chief Minister Pu Lalduhoma'n Aizawl khawpuia hriselna Aizawl khawpuia hriselna hmunhma ten chak takin hma a sawn mek tih a sawi.

Chief Minister hian Social media kaltlangin he thu hi a sawi a, Aizawl khawpuia hriselna hmunhma ten chak takin hma an sawn tih sawiin hun reilote chungin hmasawna thar an hmuh belh zel a ti a, Phai lama damdawiin tha zawk pan ngai lova inenkawlina an neih belh zel tur thu a sawi a ni.

Pu Lalduhoma chuan khawtlang tha nei turin mipui tanrual bakah sawrkar thawhpui that a pawimawh thu sawiin chak taka hma an sawn zel theih nan mitin theihtawp chhuah turin a sawm a ni.

<><><>

EVM RANDOMIZATION & FIRST LEVEL CHECKING

Tun thla April ni 21-a AMC inthlanna neih tura Vote thlakna khawl EVM endik thawh khatna chu nimin khan zawhfel a ni.

First Level Checking of EVM-ah hian EVM siamtu BEL Engineer 4-in EVM hi an endik a. Naktuk (9th April) atangin Randomization leh Commissioning neih chhonzawm a ni ang.

April ni 21-a AMC inthlan lo awm turah hian political party pathum - Indian National Congress (INC) Mizo National Front (MNF) leh Zoram Peoples Movement (ZPM) ten ward tin chuh turin candidate 19 theuh an nei a, Bharatiya Janata Party (BJP) pawhin ward 11 chuh turin candidate an nei bawk.

Vote thlak ni tur atan April ni 21, 2026 ruat a ni a, zing dar 7 atanga tlai dar 5 thleng vote thlak hun hawn a ni ang. Inthlan result hi April ni 27 zing dar 8 atangin chhiar tur a ni.



HEROIN SEIZED

Champhai Police chuan nimin tlai dar 4:30 khan Chhungte dai kawng sira thu Lalbuatsaiha (21) Tlamsam khua ni-a insawi chu ringhlelin thu an zawtfiah a, a thutna bulhnai hnim karah Heroin a thuhruk thu a sawi chu enfiain, Heroin hawng 4 an hmuchhuak a. An chhui zuina atangin he ruihhlo tawlhnaa inhnawnawihah puh midang pahnih Lawmnasanga, kum 40 Khawhai leh Lalrinthangi, kum 35 Tlamsam khua ni-a insawite an man belh leh a ni.

Champhai Police hian Thawhtan zing dar 7 khan Chalbawia Junction, Khankawn Check Gate patlang tur Maxicab pakhat an endikna atangin Heroin hawng 5 an man a. a neitu-a puh Lalpekthuama, kum 30 Seling khua ni-a insawi chu man nghalin, heng ruihhlo neitu-a puhte hi Champhai Police Station-ah ND&PS Act hmangin thubuai an siam sak a ni.



HLAKUNGPUI MUAL

Mizo Hlakungpui Mual thawh 6-na ni hnihna chu wawiin hian Khawbung ah hman chhonzawm a ni dawn a, Hla Kungpui Mualah Mizo thu ziak mi 4 leh hla phuah thiam mi 2 chawimawina lung hawn a ni ang.

Champhai District chhung Khawbung khuaa Hla Kungpui Mual hi kum 1986 khan Mizo hlaphuah thiam Patea leh Damhauva te hriatrengna lung phun a bultan niin, kum 10 dan zelah thu leh hla lama thawhhlawk boral tawh zinga thlan chhuah bikte chu a ni bi kima an thih ni atanga kum 5 tling chinte sengluh thin an ni.

Hla Kungpui Mualah hian thu ziak mi 15 leh hla phuah thiam mi 21 hriatrengna lung phun a ni tawh a; kuminah Mizo zinga thu ziak mi pali - Capt. LZ Sailo, Rev. Zairema, Khawkungi leh Lalhmingliana Saiawi bakah hla phuah thiam pahnih - Hrawva leh Lalmama te chu Hla Kungpui Mualah hian seng luh an ni.

Hla Kungpui Mual hi puitling tan luh man Rs. 20 a ni a; kum kalta 2025 chhung khan Hla Kungpui Mual hian tlawhtu mi 6,915 neiin, an zinga mi 11 hi ramdang mi (foreigner) an ni a, India ram state dang mi 16 an awm bawk.

<><><>

TOURISM MINISTER

Tourism Minister Pu Lalngthinglova Hmar chuan ram dang leh state dang awm ngailo ‘Haw Runpui’ chu Mizote chauh neih thin ani a ti a, mahni chawr chhuahna ngaihhlut leh hriat reng a pawimawh thu a sawi.

Nimin khan International Seminar on Mizo Hlakungpui Mual Thawh Rukna Khawbunga neih a hmanpui na ah he thu hi sawiin Pu Lalngthinglova Hmar chuan Khawbung khua chu mahni inchawimawi thiam tak leh khaw inlungual an nih thu leh khaw entawn tlak tak an nih thu a sawi a, mahni chawrchhuahna hriat reng a pawimawh thu sawiin ram dang leh state dang awm ngailo ‘Haw Runpui’ chu Mizote chauh neih thin ani a ti bawk.

Minister hian Mizo Hlakungpui mual seminar puala buatsaih souvenir "Zo Tui" tih lehkhabu a tlangzarh a, Khualzahawm Pu Lalmuanpuia Punte chuan Pu Patea leh Pu Damhauha te chanchin ziahna lehkhabu a tlangzarh a ni.

<><><>

CENTRAL YMA

Central YMA Co-Ordination Committee Vawi 105-na nimina thukhawm chuan ‘Inner Line Permit (ILP) chu tun aia khauh leh awmze nei zawka kalpui anih theih nan sawrkarah thlen ni se tiin an rel.

Central YMA Co-Ordination Committee Vawi 105-na Central YMA President Pu R. Lalnggheta kaihhruai thutkhawmah hian ILP khauh zawka kalpui anih theih nana hmalak bakah Tui hna humhalh dan siam ni se an ti a, Mizoram chhunga inkalpawhna kawngpui hrang hrang a chhiat avanga mipuiten harsatna an tawh chu a ziaawm theih nan Mizoram sawrkar in tun aia chak zawka hma la tura sawrkarah thlen ni se tih an rel a ni.

CCC thukhawm hian Mizo hmeichhia ten hnam dang an neih zel loh nan in zirtirna nasa lehzuala kalpui turin an rel a, 'Zohnanthlak chi peng hrang hrang Mizoram-a chengte zingah chibil hmalakna a awm tawh loh nan hma lak an rel bakah Mizoram chhunga hnam dang sumdawng tam lutuk chu ti tlem turin hma lak an rel a, YMA nihphung, inkaihhruaina leh hruaitute mawhphurhna rampumah inzirtirna huaihawt bakah Mizo infiamna chawisan a nih theih nan hmalak an rel a, Ruihhlo Do kawngah theihtawp chhuah a hmalak zel nise an ti bawk a ni.

<><><>

LAWNGTLAI DC

Lawngtlai Bawrhsap Pu Donny Lalruatsanga'n nimin khan Lawngtlai khawpui chhunga damdawi In tlawhin an mamawh hrang hrang a enfiah.

Pu Donny Lalruatsanga chuan District Hospital, Lawngtlai a tlawhna ah thawktuten Damlo an enkawlna kawngah an hnathawh fakin thahnem ngai taka thawk zel turin a fuih a. District Hospital chu mi changhai zawkten an pan nasa tih sawiin Civil Hospital tan motor pek an nih tur thu a sawi a, MUCHS 2.0 bikah uar zawka inzirtirna kalpui a tul thu a sawi a ni.

DC hian Lairam Christian Medical Centre & Hospital pawh tlawhin Nursing School an din tur chu lawmawm atih thu a sawi a, Chhimbial mai bakah hmun dang atanga zir duh tan a tangkai dawn tih sawiin an mamawh an lo thlen angte bawhzui a tum thu a sawi a ni.



Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.



TB MukT Bharat Abhiyan

Ramchhunga Ngawr (TB) natna umbo beihpui TB MukT Bharat Abhiyaan Phase 2 hnuai TB zawnehhuah hna kalpui chu 4th IR Battalion, Mamit Luangpawl vengah neih a ni.

100 Days Campaign (Ayushman Arogya Shivar) kal mekah District Bawrhsap Pu Suvigya S Chandra chuan Mamit District chhungah TB umbo a nih theih nan hma lak mek a ni a ti a, hand held X-ray screening chu khawl tha tak niin TB zawnehhuah nan AI tel an hmang thei chu thil pawimawh tak a nih thu sawiin Mamit district mipui te pawhin ngaipawimawh turin a chah a ni.

TB zawnehhuah hna kalpui mekah hian Hand Held X-ray khawl hmangin TB Screening mi 512 te hnenah neih tawh niin heng zinga mi 100 vel te chu TB vei rinhlelhawm niin an Khak test a nih hnuah TB an vei lo tih finfiah an ni.



ELECTION

Tukin dar 7 atang kha n Keralam, Assam leh Puducherry Assembly inthlan vote thlak tan a ni. Heng state leh UT ah te hian inthlan thawhkhata neih tur a ni a. Keralam ah Assembly bial 140, Assam ah 126 leh Puducherry ah bial 30 ah te vote thlak a ni dawn a. Inthlanna felfai leh thianghlim tak neih anih theih nan venhimna pawh khauh taka kalpui a ni. Prime Minister Narendra Modia chaun Assam inthlan turah hian mipuite te vote thlak theuh turin social media kaltlangin a sawm a ni.



UNION CABINET

Union Cabinet chuan kumin nipui thlai chin chungin Phosphatic leh Potassic leitha-ah te nutrient based subsidy cheng vaibelchhe sing 4 leh sang 1 pek a remti. Union Information and Broadcasting Minister Ashwini Vaishnaw chuan Union Cabinet thutlukna New Delhi-a chanchinbumite a kawmnaah he thu hi a sawi a. Kumin Aprtil ni 1 atanga September ni 30 inkarah he subsidy rate thar hi hman a ni ang a ti.

Hei bakah hian Union Cabinet chuan Arunachal Pradesh-a cheng vaibelchhe sing 2 leh sang 6 senna tur Kamala Hydro Electric Project din a remti bawk a ni..

